

# Atmosfera cordiala duront filmar «Amur senza fin»

Per Muriel Degonda ella rolla da Peppina ei in grond giavisch ius en vigur

DA SUSI ROTHMUND / ANR

■ Avon la realisaziun digl'emprem film da televisiun romontsch ch'ei vegnius filmaus a Sagogn, ha ei dau castings per massa statists e per las rollas empau pli grondas da Peppina e Leo, ils affons dils protagonistas Mona (Rebecca Indermaur) e Gieri (Bruno Cathomas). La rolla da Leo ha Bono Jacomet da Surrein survegniu. Muriel Degonda da Cumpadials ha astgau giugar la rolla dalla Peppina. «Jeu hai aunc bucu viu il film e sundel fetg spannegiada da veser quel per l'emprema ga gl'emprem d'uost als dis da film a Locarno», ha Muriel Degonda declarau sin damonda dall'anr. Cu la giuvna da 16 onns raquenta dil casting, dalla lavur sil set da filmar e dallas aventuras ed experientschas en quei connex tarlischa ella sur l'entira fatscha. Muriel fa la matura alla scola clausurala a Mustér ed igl ei stau leu ch'ei han survegniu in mail da «Zodiac Pictures», l'agentura che ha tschercau statistas e statists per «Amur senza fin».

## Quintava buc culla rolla

«Ei encurevan aunc in giuven ed ina giuvna da 16-18 onns», seregorda Muriel ed aschunta ch'ella hagi targlinau empau e tarmess per il davos di pusseivel in mail ed ina foto all'agentura. Quels hagian rispundiu spert e giavischau dapli fotos ed indicaziuns persunalas e pli tard hagi ella giu da giugar ina scena per romontsch e tudestg, filmar tala e tarmetter en. La finfinala eis ella vegnida clamada a Turitg al casting e ha giu da preparar per quei di ina pintga scena da giugar ensem cun auters candidats. «Jeu erel extrem nervusa, e hai ina ga perfin emblidau il text», ha la simpatica matta concediu descrivend sia agitaziun davon la camera ed en preschientscha dil regissur Christoph Schaub. Pli tras ga ha ella giu da giugar e repeter cun differents mats che eran medemamein al casting. La finfinala ha ella giu da far il medem cun Bono. «Nus havein giu da giugar mo ina ga ensem, lu han ei detg ch'ei seigi bien e schau ir a casa nus», ha Muriel detg ed aschuntau ch'ella havessi mai quintau da survegnir



Muriel Degonda e Bono Jacomet (da sen.) ein dus acturs laics che han astgau giugar bialas rollas en «Amur senza fin», e quei cun acturs sco Bruno Cathomas, Marietta Jemmi e Rebecca Indermaur.

FOTO SRF

la rolla. Ina jamna suenter il casting ha la matta che fa fetg bugen teater denton survegniu in mail ch'ella hagi la rolla da Peppina: «Jeu hai giu plascherun, in grond giavisch ei ius en vigur.»

## Entscheidra cun ambiziuns

Suenter ils emprems telefons culs responsabels ha Muriel gia survegniu il script e giu dad ir a Laax per l'emprova da costumes, frisuras e masca. Duront in di han Muriel e Bono survegniu in «fundament» per star avon la camera dall'actura Annina Sedlacek. Pli tard han els en-tupau ils geniturs ch'ei han il film e trenau cul regissur e cun Mario Pacchioli ch'ei staus responsabels pils dialogs romontschs. «Jeu hai stuiu discuorer sco

quels dalla Foppa», ha Muriel declarau cun in surrir e manegiau ch'ella hagi stuiu repeter enqualga ina scena perquei ch'il «dialect» constevi buc diltut. Digl'emprem di da filmar seregorda Muriel aunc fetg bein. Gia baul ha ella stuiu ord las plemas per entscheiver allas 6.30 ed ella eri extrem agitada e spannegiada. Quei di han els filmau la davosa scena da «Amur senza fin» e sco l'actura-entcheidra ha declarau, seigi ei stau legher da giugar ina famiglia cun persunas ch'ella enconuschevi strusch. Sil set han ella e Bono astgau profitar bia dils acturs versai ch'ei tenor Muriel stai fetg segideivels. Els hagian dau ina massa buns cussegls e predevien peda da rispunder tut las damondas. Duront las scenas le-

gras ha ei dau bia da rir e magari era pervia d'in incap, sco lezza ga cu ella havevi pitgau en il tgau duront vegnir d'in ésch ora. «Bruno e Rebecca ein fetg cordials e leghers – persunas sco ti ed jeu», ha Muriel puntuau. Ils profis han era declarau alla giuvna tgei vias ch'ei dat per vegnir actura da professiun.

Daventar in di actura da teater ni film – ni ina mischeida – ei numnadamein gia daditg siu siemi, ed entras l'emprema rolla en in film eis ella ussa in pass pli datier alla realisaziun da quel. Era ses geniturs Isabelle e Clau han plascher per ella e dattan il sustegn necessari. «Memia bia plans fetsch jeu denton aunc buc, igl'emprem less jeu far la matura e lu mirar tgei studi che suonda», ha Mu-

riel che ha neginas attitudas da stars declarau.

## «Jeu Muriel – jeu Peppina»


La giuvna da 16 onns ei sesluitta ella rolla da Peppina, ina matta da 18 onns. «All'entschatta erel jeu savens ualti nervusa, mo jeu sperel ch'ins vesi buc quei el film», manegia Muriel che ha aunc bucu viu il film. Ei seigi stau da rir e bargir e far empau diltut. La scena nua ch'ella ha giu da dar giu in commentari brav provocativ ei sia preferida ed in smiul loscha eis ella sin ina scena emozionala nua ch'ella ei perfin vegnida da schar vegnir las larmas, senza gidar suenter cun trics. «Mo forsà han ei lu era tagliau ora quei», ha ella aschuntau. Duront 22 dis ei vegniu filmau per «Amur senza fin» e Muriel ei stada dalla partida diesch. Ei seigi era stau da star entuorn dabia e spitgar, ed in di ha ella stuiu ir a Sagogn mo per diesch minutas. La veta d'actura plai denton fetg bein, era sch'ei hagi mintgamai duvrau empau concentraziun da vegnir ella rolla. «Tochen tier in cert punct han bein tut las giuvnas ils medems interess, Peppina ei denton empau ina tugna. Quei ei stau ina sfida per mei, mo jeu hai tuttina aunc astgau purtar dabia da mia persunalid ella rolla», ha Muriel che para dad esser tut auter ch'ina tugnusa declarau. D'ina actura ha ella survegniu il cussegl da repeter midond plaz «jeu Muriel» – «jeu Peppina». E quei ha gidau detg pulit. Ils aspectaturs astgan esser spannegiai sil resultat, e Peppina vegn franc ad esser ina buna mischeida dalla Muriel da Cumpadials ed il caracter fictiv.

## Cuort e bien

*Num e prenum:* Degonda Muriel  
*Domicil:* Cumpadials  
*Naschida:* 21-11-2001  
*Scolaziun:* maturanda a Mustér  
*Hobis:* far teater, volleyball, saltar, star da cumpignia  
*Film preferiu:* «Amur senza fin», «Vielleicht lieber morgen»  
*Actura preferida:* Emma Watson

## Laax e Falera: ensolver e «fiug» cun laser

■ (anr/abc) Las vischnauncas da Laax e Falera festiveschan communabla in igl'emprem d'uost. La damaun a Falera, la sera a Laax. La fiasta naziunala havevan ils biars loghens turistics s'immaginau e planisau autruisa. Numnadamein cun in endretg fiug digl'1. d'uost e forsà aunc cun in grond fiug artificial. Aschia ei la populaziun disada a Laax. En Surselva eis ei enconuscent che la vischnaunca da Laax porscha mintg'onn in grond fiug artificial sur il Lag Grond. Pils hosps da vacanzas, mo era per biars indigens da Laax e dalla regiun eis ei daventau ina tradiziun dad ir a mirar mintgamai allas 22.00 quei fiug cun sbrenzlas e cametgs. Uonn han las autoritads stuiu decretar in scamond da far fiug, quei che ha influenzau las preparativas digl'emprem d'uost. Vendergis vargau ha la suprastanza communal da Laax decidiu ord quella situaziun da porscher ina alternativa. La populaziun d'ei buca desister dall'attracziun speciala per la fiasta naziunala. Enstagl d'in fiug artificial vegn il tschiel sur il Lag Grond illuminau cun ina show da laser. Igl'avantatg da quella ei ch'ei dat negin fem e bumbardadas. Ei van pia buca siadora ell'aria ratchetas e canunadas, mobein radis da glisch da tuttas colurs. La sera fiasta a Laax, la damaun fiasta a Falera: La



A Laax remplazza uonn ina gronda show da laser igl usitau fiug artificial sul Lag Grond.

MAD

fiasta digl'emprem d'uost entscheiva gia la damaun allas 9.00. Las duas vischnauncas organischan numnadamein dapi zaconts onns communabla in ensolver da purs a Curnius. Naven dalla 9.00 tochen las 11.30 ein las festivitads cun produziuns dil Chor viril, dalla Societad da musica e dils Sunatibas da Falera. Per il di dalla fiasta naziunala ei il president dall'Arena Alva, Reto Gurtnier,

igl oratur festiv. Indigens e hosps da vacanzas contonschan la tegia da Curnius culla sutgera naven da Falera. Denter Falera, Laax e Flem curschan bus da shuttles gratuits. A Laax ei la tenda da fiasta lu aviarta naven dallas 16.00. Allas 18.00 suna la band «ChueLee» ed allas 22.00 suonda il finale: Enstagl da petardas, fem e canunadas la show cun radis da laser e musica.

## Cristallas e minerals dalla Val Tujetsch

■ (anr/hh) Per la quarta ga ha l'Uniuon Cristal Tujetsch organisau la dumengia vargada ina buca da cristallas e minerals sin la piazza avon la Banca cantunala grischuna a Sedrun. Sis expositurs han purschiu lur scazis alla populaziun ed als hosps da vacanzas. Igl ei ina purschida che va bein a prau cul temps da stad ed ei leutier in'attracziun turistica. Hosps da vacanzas mo era cavacristallas ed auters simpatisants dalla mineralogia han nezegiau quella caschun da far ina viseta alla buca. Cristallas e minerals stai

exponi la dumengia ed offeri per la compra derivan tuts dalla Val Tujetsch. Tier geologs e mineralogs ei la val fetg bein enconuscenta pervia da sias cristallas e ses minerals. Els ein d'anflar sigl'entir territori, specialmeindenton ellas vals lateralas sco il Cavradi. Quei ei dil remiment il sulet liug sigl'entir mund nua ch'ei dat aschi bials hematits (alas fier) cun rutil. In liug bein enconuscent ei era la Val Giuv. Da quella val el nord derivan las bialas cristallas nerass, ils mulai ch'ei fetg tschercai sco era il renomau milarit.



L'Uniuon Cristal Tujetsch ha purschiu la dumengia vargada ina buca da cristallas e minerals a Sedrun.

FOTO H. HUONDER